

# Qamutit motorillit Qeqqata Kommuni asimi angallassissutiginnissat pillugu ileqqoreqqusaq

Assartuutit motorinik ingerlatillit atornerqarneri pillugit Namminersorlutik Oqartussat nalunaarutaat nr. 10, 10. oktobari 2013-imeersumi § 4, imm. 2 aamma § 6, imm. 5 imm. naapertorlugit aalajangersarneqarpoq:

## Kapitali 1

### Atuuffi

§ 1. Qeqqata Kommuni nunaannarmi qamutit motorillit angallassissutiginnissat pillugu ileqqoreqqusaq.

Imm. 2. Ileqqoreqqusaq ukunani atornerqassanngilaq:

- 1) Sermersuarmut serminullu sermersuarmiit iigarfusartunut angalanermi
- 2) Nunaminertamik atuisarneq aamma pilersarusiorneq pillugit Inatsisartut inatsisaat atuuttoq naapertorlugu atuisussaatitaanermik nalunaaruteqartariaqartumik aqqusinerni, unittarfinni narsaatinilu il. il. angallanneq.
- 3) Inuussutissarsiutigalugu nersutaateqarnermik ingerlatsinermut atatillugu angallanneq
- 4) Nakkutilliinermut oqartussaasut teknikkikkut atortuusivinnik, ilisimatusarnermut atatillugu angallannerit assiliortuinissamullu misissuinernik nakkutilliinerannut kiisalu piniarnermik nakkutilliinermut atatillugu angallanneq.
- 5) Annaassiniarnernut, politiit paasiniaaneranut, sakkutuut suliaqarnerinut assingusunullu ajornartorsiornermi upalungaarsimanermut atatillugu angallannerit.

Imm. 3. Sumiiffinni, angallatit motorinik ingerlatillit atorlugit angallannerimut inatsisit allat aqqutigalugit maleruagassiuiffiusuni, maleruagassiat sukkulluunniit killilersuiffiunerusut atuutissapput.

## Kapitali 2

### Suunerinik nassuiaatit

§ 2. Maleruagqusami matumani makku imatut paasineqassapput:

- 1) Illoqarfiit nunaqarfillu: Nunaminertat, kommuninut pilersaarummi illoqarfittut nunaqarfittullu siunertaqarfiusunut atugassanngortinneqartut.
- 2) Nunap timaa: Nunaminertat illoqarfiit nunaqarfillu avataaniittut kiisalu kangerluit imartallu sikuunermik nalaani naatsorsuunneqassapput.

- 3) Motoorilinnik angallassissutit: Assartuutit tassaatinneqarput qamutit motoorillit suulluunniit larvefodillit assakaasunilluunniit ingerlatillit, sikumi, apummi, qaqqani kiisalu nunap ilusaani allani allannngortinneqanngitsuni atugassatut sanaat taakkunaniluunniit atorineqartartut.
- 4) Assartuineranut aqquutit: Aqquutit assartuineranut atatillugu taamaallaat atorineqartut.
- 5) Ukiuunerani ingerlavissiat: Immikkoortut angallanneranut nalinginnaasumik aalajangersakkanit mianerinnittumik nunami suulluunniit angallassissutaasinnaasut.
- 6) Ukiuunerani assartuussineranut ingerlavissiat: Qeqqata Kommunia angalasinnaanermut akuersissuteqareeripaat angallassissutinik motoorilinni ilanngussaq A-mi ukiuunerani angallassissutitut akuerisaasut. Ukiup qanoq ilinerani pissutsit Qeqqatalu Kommuniata nittartagaatigut sapaatip akunneranik sioqqutsilluni tamanut saqqummiussereernermit piffissaq ukiumiit ukiumut sivilissuseqarsinnaavoq.
- 7) Aasaanerani assartuussineranut ingerlavissiat: Qeqqata Kommunia angalasinnaanermut akuersissuteqareeripaat ilanngussaq A-mi angallassissutit motoorilittut taaneqartunik nunap assingani 5-imi takutinneqartumi ATV-nut aqquutitut aqqusinertulluunniit sioraasutut pilersitaasut. Ukiup qanoq ilinerani pissutsit Qeqqatalu Kommuniata nittartagaatigut sapaatip akunneranik sioqqutsilluni tamanut saqqummiussereernermit piffissaq ukiumiit ukiumut sivilissuseqarsinnaavoq.
- 8) Imeqarfiit killegarfii: Erngup imerneqarsinnaasup imermik takkuttarfii aammalu avatangiisit innarlitsaaliorneqarnissaanik Inatsisartut inatsisaat nr. 9, 22. novembari 2011-meersumit illersugaasut.
- 9) Ukiuunerani piniartarfii: Immikkoortut umimmanniarnermut tutunniarnermullu atatillugu Aalisarnermut Piniarnermullu Naalakkersuisoqarfimmit ukiumoortumik toqqarneqartartut.
- 10) Angallanneq inerteqqutaavoq: Immikkoortut ukiuunerani piniarnermut atatillugu nunap assinganut ilanngussaq 1-imi aamma 3-mi takutinneqartuni taamaallaat inuussutissarsiornermut tammajuitsussarsiornermullu piniarnermut siunertamut angallannerit akuerisaapput.
- 11) Ukiuunerani, aasaanerani ukiorlu kaajallallugu angallannerit: Iteqqoreqqusami matumani piffissap ingerlanerani atuuffituai. "Ukioq kaajallallugu angallanneq" tassaavoq ukioq kaajallallugu angallaffusinnaasoq. Piffissallu "aasaanerani ukiuuneranilu angallannerit" ukiup qanoq ilinerani pissutsit Qeqqata Kommuniata nittartagaatigut sapaatip akunneranik sioqqutsilluni tamanut saqqummiussereernermit piffissaq ukiumiit ukiumut sivilissuseqarsinnaasoq Qeqqata Kommuniarmit aalajangersarneqartarpoq.

### **Kapitali 3**

#### *Angallassissutit motoorilinnik atuinermut aalajangersakkat nalinginnaasut*

**§ 3.** Nunaannarmi assartuutinik motoorinik ingerlatilinnik atuinissaq inerteqqutaavoq, taamaattoqli tak. imm. 2 aamma 3

*Imm. 2.* Assartuutinik motoorinik ingerlatillit, imm. 1-imiittut apeqquataatinnaq, piffissami sumiiffinnilu ilanngussaq A-mi ilaatinneqartutigit atorineqarsinnaapput.

*Imm. 3.* Kommunalbestyrelse imm. 1-ip aamma 2-p malitsigisaasa saniatigut angallassissutinik motoorilinnik atuinissamut immikkut ittumik akuersissuteqarsinnaavoq.

*Ukioq kaajallallugu angallassissutinik motoorilinnik atuiniaq*

**§ 4.** Ilanngussaq A-mi angallassissutininik motoorilinnik taaneqartunik nunaannarmi aqqusinerni sioraasuni ukioq kaajallallugu angallattoqarsinnaavoq.

*Ukiuunerani assartuussinermut ukiuuneranilu angallavissiakkut angallassissutininik motoorilinnik atuineq*

**§ 5.** Ukiuunerani assartuussinermut ingerlavissiatigut ukiuuneranilu angallannermi killeqarfitsigut assartuutininik motoorilinnik angallanneq taamaallaat pisinnaavoq 15. oktobarip aamma 31. maajip akornanni. Ukiup qanoq ilinerani pissutsit Qeqqatalu Kommuniata nittartagaatigut sapaatip akunneranik sioqqutsilluni tamanut saqqummiussereernermi piffissaq ukiumiit ukiumut sivissussuseqarsinnaavoq.

*Imm. 2.* Tamatuma saniatigut angallanneq taamaallaat pisinnaavoq nunap naqqa 30 centimeterimik ititigisumik qerisimappat apummillu pukkinerpaamik 20 centimeterimik qallerneqarsimappat

*Imm. 3.* Ukiuunerani assartuussinermut angallavissiat aammalu § 6 imm. 2-mi ATV-nut aqqutitut taaneqartoq taamaallaat ilanngussaq A-mi angallassissutininik motoorilinnik atorineqartussatut taaneqartumi atorineqarsinnaavoq.

*Imm. 4.* Ukiuunerani angallavissianut immikkoortut suussutsit pingasut immikkoortinneqarput, tassani angallassissutininik motoorilinnik tullinnguuttunik atuisoqarsinnaalluni:

- 1) Ukiuunerani angallavissiaq takuuk nunap assinga 1-4, ilanngussaq A-mi allanneqartutut ukiuunerani angallavissanut angallassissutininik motoorilinnik atuiffusinnaasoq.
- 2) Sermini iigartartuni ukiuunerani angallavissiat takuuk nunap assingi 1-2 ilanngussaq A-mi allassimasumut taamaallaat angallassissutininik motoorilinnik atorineqarsinnaasoq.
- 3) Kangerlussuarmi ukiuunerani piniariartarfiit, ilanngussaq A-mi tassunga allassimasumut angallassissutininik motoorilinnik taamaallaat atorineqarsinnaasoq, aammalu taamaallaat piniarnissamut piffissani immikkoortunilu ukiuunerani piniarnissamut akuerissaasumit ingerlatsinissamut. Umimmannik tuttunillu ukiuunerani piniarneq taamaatiinnarneqassagualuarpasut piniariartarfinni angallassissutininik motoorilinnik angallattoqassanngilaq.

*Aasaanerani angallassissutininik motoorilinnik atuineq*

**§ 6.** Qeqqata Kommuniani angallanneq inerteqqutaannginneranik nalunaaruteqareeriarpat aasaanerani assartuussinermut angallassissutininik motoorilinnik angalasoqarsinnaalissaaq. Ukiumi pineqartumi ukiuunera qanoq apeqqutaalluni ukiumiit ukiumut piffissaq nikerarsinnaavoq.

*Imm. 2.* Ilanngussaq A-mi nunap assinganut ilanngussaq 5-imiittumi angallassissutininik motoorilinnik taaneqartunik assartuussinermut aqqutissatut immikkoortitat iluanni ATV-nik ingerlasoqarsinnaavoq. Uku akornanni ATV-nut aqqutitut tullinnguuttunut atuuppoq:

- 1) Sisimiut aamma Kangerlussuaq.
- 2) Sermersuarmut Russells gletsjerimullu aqquserngup sioraasup akornanni.
- 3) Sermersuarmut aammalu Keglen kangiani qorlortumut (Sugarloaf, Kangerlussuaq) aqquserngup sioraasup akornanni
- 4) Eqalugarniarfiup Tasia aamma Eqaluguniarfik (Oles lakse elv) akornanni
- 5) Imeqarfiup Tasersuullu akornanni
- 6) Eqalugaarsuit Kuuniit Qaqqatoqqap tungaanut

**§ 7.** Imeqarfiup killeqarfia aqqusaarlugu angallassissutiniq motoorilinnik angalanissaq inerteqqutaavoq.

*Imm. 2.* Imm. 1 apeqquataatinnagu imeqarfiup killeqarfiata iluani angallassissutit ilaat atorpeqarsinnaapput, piumasaqaatit tullinnguuttut malitsinneqarpata kommunillu akuersissutigisimappagu:

- 1) Sisimiut apisimanerani qamuteralannut aqqutissatut sungiusartarfittullu ilisarnaasikkap iluani qamuteralaat kiisalu ujakkaarnermut illinertut, qamuteralannut aqqutip sisorartarfimmiluunniit Alanngorsuarmik allassimasumi illinerit atuarlugit qamussuit atorpeqarsinnaapput, Sisimiut eqqaanni imeqarfiup killeqarfilerneqarneranut immikkut ittumik maleruagassat pillugit Namminersorlutik Oqartussat nalunaarutaat nr. 9, 30. april 2015-imeersoq innersuussutigalugu.
- 2) Takuuk nunap assinga 1 aamma 5 Kangerlussuup Sisimiullu akornanni oqartussanit ATV-nut aqqummik kiisalu aqqusinermut sioraasumi takuuk ilanngussaq A, taakkununga tulluartausunik angallasissutiniq motoorilinnik aasaanerani ukiuuneranilu ingerlasoqarsinnaavoq, taakku Sisimiuniit Kangerluarsuk Tullermut aqqusinermut ASN-imik akuersissut.
- 3) Maniitsumi apisimatillugu illiniliuutit namminerlu qamuteralaat sisorartarfimmut ingerlanissamut atorpeqarsinnaapput. Sivikitsumik uninnganeq nunami manissumi pissaaq, tatsiniit kuunniillu minnerpaamik 100 meterimi, Maniitsup eqqaani imeqarfiup killeqarfiani illiniliuutiniq angallannermut immikkut akuersissut 26 februar 2016-iminngaaneersoq innersuussutigalugu.

**§ 8.** Imeqarfiup killeqarfiata iluani akuutissat, kemikalia uulialu atorlugit tunisassiat kiisalu nassatat ulorianartut assartoqqusaanatillu paareqqusaanngillat. Soorluttaaq eqqagassanik qimatsisoqaqqusaanngitsoq.

*Imm. 2.* Imm. 1 apeqquataatinnagu imeqarfiup killeqarfiata iluani orsussanik assartuussineq pisinnaavoq, piumasaqaatit tullinnguuttut naammassineqarsimappata:

- 1) Orsussaq taamaallaat nammineq atugassanngorlugu nassarneqassasoq aammalu orsussaasivinnik annerpaamik 20 literimik imaqqortussusilimmi CE-mik ilisarnaasikkani assartorneqassaaq.
- 2) Orsussaasiviit napatinneqassapput, matulluqaqallutik aalajangersimallutillu aamma/imaluunniit angallassissutigisamit nakkarsinnaajunnaarlugit qajannaarneqarsimassapput.
- 3) Angallassissutip motoorillip orsussaasiviata imarisinnaasaatut orsussaq annerpaamik 100 liter sinnerlugu, piumasaqaatinik qulaaniittunik naammassinnittuusumik amerlassusillit orsussaasiviit taamaallaat nassarneqarsinnaapput.
- 4) Assartuineq nammineq atugassatut pissasoq, tankbilinnik angallassineq ilanngullugu orsussamik tuniniagassamik assartuussineq tamatigut inerteqqutaammat.

*Imm. 3.* Imm. 2-mi 3-milu aalajangersakkat apeqquataatinnagit, majuartaateqarfimmut orsussaasivinni annerpaamik 250 literimik imaqqortussusilinnik CE-mik ilisarnaatilinni orsussamik assartuussineq pisinnaavoq aammalu uuliamik tunisassiat annerpaamik 800 liter nassarneqarsinnaapput. Sisimiuni Alanngorsuarmi sisorartarfimmi orsussap toqqortaatigineqarsinnaasup annerpaaffissaa 1.400 literiuvoq.

## **Kapitali 4**

### *Angallannermut ataatsimut aalajangersakkat*

§ 9. Angallassissut motoorilik nunami ajutuussagalarpat, naanerit nunalu ajoqusinnginnerani piginnittup piissavai. Kommunalbestyrelsimit peqquneqareernerup kingorna qamutit motoorillit peerneqanngippata, piginnittumut namminermut akiligassanngorlugu akisussaaffinngorlugulu kommunalbestyrelsip nuutsissinnaavai.

§ 10. Eqqakkat tamarmik tiguneqassapput pinngortitamullu qimanneqaqqusaanngillat.

§ 11. Angallannermi naasoqassuseq uumasooqassuserlu mianerineqassapput, aamma nunamik innarlitsaaliuinnermut imaanilu miluumasunik piniarnermut inatsisit qaqugukkulluunniit atuuttut eqqarsaatigineqassapput. Nujuartut ungasissusissaannut piumasaqaat atuuttoq malinneqassaaq.

*Imm. 2.* Qimuttoqarfinni assartuutit motoorillit aquttuata qimussit mianerisassavai qimussertunullu sapinngisamik qaninnerpaamik 10 meterinik ungasissuseqartassalluni.

## Kapitali 5

### *Immikkoortunik immikkut mianernartunik toqqaaneq*

§ 12. Angallavioqqusaanngitsoqassappat imaluunniit Naalakkersuisut tikkuagaanni immikkoortuni immikkut mianerisassani angallannikkut nalimmassarfeqassappat, Qeqqata Kommuniata nittartagaatigut nalunaarutigineqassapput.

## Kapitali 6

### *Immikkut akuersissutit*

§ 13. Kommunalbestyrelse immikkut pisuni angallavissiani ingerlavissianilu taaneqartuni nunap assingini 1-5 avataanni angallassissutinut motoorilinnut angalanissamut ukiumut ataatsimut immikkut akuersissuteqarsinnaavoq. Immikkut akuersissut angalanermi nassarneqartassaaq.

*Imm. 2.* Immikkut akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit akunnerinik sisamanik sioqqullugu kommunalbestyrelsimit tiguneqarsimassaaq, aammalu nunaminertat imaluunniit aqutissat nalunaarsorneqarnerinik imaqassalluni.

*Imm. 3.* Kommunalbestyrelsip immikkut akuersissuteqarnermini sukumiisumik naliliineq tunngavigalugu atugassarititaasunik pissusissamisoortutut isigineqartunik saqqummiussisinnaavoq. Atugassarititaasut makkuusinnaapput:

- 1) Piffissamik killiliisarneq.
- 2) Angallatit qanoq ittuunissaannut piumasaqaat.
- 3) Uumasunut naasoqassutsimullu mianerinninnissaq pillugu piumasaqaat.
- 4) Ujaasinnermi atortut satellitsikkoortut atornerqarneri.
- 5) Allat soqutigisaanik akornusersuinaveersaarneq.

*Imm. 4.* Immikkut akuersissutit imm. 1 malillugu nalunaarutigineqartut kommunalbestyrelsimit imaluunniit Naalakkersuisunit qaqugukkulluunniit allanngortinneqarsinnaapput imaluunniit utertinneqarsinnaapput. Matumani immikkut akuersissutini atugassarititaasut unioqqutinneqarpata

imaluunniit kommunalbestyrelsip Naalakkersuisulluuniit naliliinerat malillugu pinngortitamik avatangiisinillu ajoqusiisoqarsimappat atuutissapput.

## **Kapitali 7**

### *Nakkutilliineq*

**§ 14.** Kommunalbestyrelse nakkutilliinermi oqartussaasuvoq peqqussutinillu nalunaaruteqartartuulluni imaluunniit ileqqoreqqusap matuma unioqqutinnerani inerteqquteqartitsisarluni.

*Imm. 2.* Peqqussut tassaasinnaavoq angallaviit aalajangersimasut atorineqarnissaannik piumasaqaatit.

*Imm. 3.* Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasaqaatit.

## **Kapitali 8**

### *Naammagittaalliutit*

**§ 15.** Ileqqoreqqusaq manna naapertorlugu aalajangiinerit tamarmik Avatangiisinik illersuinermit tunngatillugu Maalaaruteqartarfimmut naammagittaalliutigineqarsinnaapput.

*Imm. 2.* Maalaaruteqarsinnaatitaapput:

- 1) Aalajangiinermik nassitsivigineqartut.
- 2) Nunatsinni Nakorsaaneqarfik.
- 3) Kinaluunniit suliap qanoq naammassineqarnissaanut nammineq immikkut annertuumillu soqutigisaqartoq.
- 4) Peqatigiiffiit kattuffillu, ileqqoreqqusatik naapertorlugit peqqissarfullutik qasuersaarfusartunik, avatangiisinik pinngortitamillu annertuumik soqutigisanik isumagisaqarnissamik siunertaqartut.

*Imm. 3.* Aalajangiinerup aalajangiinermi pineqartumut nalunaarutigineqarfianit ullormit sapaatip-akunneri arfinillit naammagittaalliornissamut piffissarititaapput.

*Imm. 4.* Naammagittaalliuteqartarfiup suliame aalajangiinissaata tungaanut imaluunniit Naammagittaalliuteqartarfiup allatut aalajangiinissaata tungaanut maalaaruteqarneq peqqusinermit imaluunniit inerteqqussummut kinguartitsisarpoq. Peqqusummik inerteqqummilluunniit aalajangiisoqarsimappat, immikkut tunngaveqartoqartillugu, peqqussuteqarnerup imaluunniit inerteqquteqarnerup saniatigut, qanorluunniit maalaaruteqartoqartillugu Kommuni aalajangiinerup malinneqarnissaanik aalajangiisinnaavoq. Akuersissutitut imaluunniit immikkut akuersissummut maalaarutit kinguartinneqarneq ajorput.

## **Kapitali 9**

### *Kinguneqartitsinerit*

**§ 16.** § 3, imm. 1, § 5, imm. 1-4, kiisalu § 6, imm. 1 aamma 2 naapertorlugit unioqqutitsinerit akiliisitsissutaasinnaapput aamma/imaluunniit arsaarinnissutaasinnaapput.

*Imm. 2.* § 14, imm. 2 aamma 3 naapertorlugit peqqusinermit inerteqqummilluunniit unioqqutitsineq akiliisitsinermit kinguneqarsinnaavoq.

*Imm. 3. Ileqqoreqqusami akiliisitsinissamik pineqaatissiinissaq tunngavissinneqarsimappat, akiligassiissut Kalaallit Nunaanni pinerluttulerinermut inatsimmi maleruagassat malillugit inuk inatsisilerisoq akiliisinneqarsinnaavoq.*

*Imm. 4. Imm 1-3 naapertorlugit akiliisitsissutit arsaarinnissutaasullu, Nunatta Karsianut nakkartinneqassapput.*

## **Kapitali 10**

### *Atortuulersitsineq*

**§ 17.** Ileqqoreqqusaq una nalunaarutiginninnerup kingorna qaammatsiutit ulluisa 30-t qaangiunneranni atuutilissaaq.

*Imm. 2. 2024-mi decembari 13-ani Qeqqata Kommuniata Kommunalbestyrelsianit akuersissutigineqarpoq.*

*Qeqqata Kommunia, ulloq 13. december 2024*

**Malik Berthelsen (atsior.)**  
Borgmesteri

/ Hans Christian Sværd

**Namminersorlutik Oqartussat**  
Imaneq 4  
3900 Nuuk  
E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut

